

REGIONAL NEWS

LADC POLLS

Member 25 awmna Lai autonomous district council (LADC) inthlan lo awm turah ven uluk ngai polling station atana puan a la awm rih lo.

State election commissioner Dr. H. Lalthlangliana chuan December ni 3 a LADC inthlan lo awm tur atan polling station 111 zingah venhim zual ngai polling station a awm loh thu a sawi a. Lirthei luh theih lohna, ke chauhva tlawh pawh theih polling station 4 bakah lawng hmang chauha kal pawh theih polling station pakhat a awm thu a sawi baw. LADC inthlan lo awm tur atan hian returning officer 3 ruat an ni a. District Election Officer (DEO), Lawngtlai bawrh sap ni baw Pu Donny Lalruatsanga chuan LADC inthlan lo awm tura inpuahchahna hrang hranga mawhpur turin District Level Standing Committee (DLSC) a din a. DEO chu chairman ni-in election officer chu member secretary a ni a. Member dangte chu returning officer leh nodal officer zawng zawng bakah CYLA, district MJA, LUP, MUP, LWA, MHIP, LSA leh political party district president theuhte an ni.

LADC inthlan lo awm turah hian vote nei mi 56,857 an awm mek a, an zinga 29,013 hi hmeichhia an ni a, mipa 27,844 an awm baw. Polling Station- a Vote awm tamna ber chu vote 1,189 awmna Pangkhua a ni a, vote tlemna ber chu vote 1 chauh awmna Hmawngbuchhuah a ni. Thu dawn danin Hmawngbuchhuah khua-ah hian Mizoram mi dik tak, India khua leh tui an awm meuh lova, draft electoral roll-ah vote nei pathum an awm lai-in khua leh tui an nihna finfiah theih loh an nih hlawm avangin vote nei pakhat chauh a awm ta a. He khua a awmte hi Myanmar a Rakhine state a chengte leh Chin state chhim lam Paletwa leh a chhehvel khua ami Myanmar rambuai avanga rawn tlanchhia deuh vek an ni .

A khaw thenawm amite chuan 'Zakhai' hnam an ti a, Kawl tawng an hmang a, Buddhist sakhaw bia vek an ni baw a. Kum 2019 July thla khan Hmawngbuchhuah khua a raltlan awmte hi Myanmar a an khua a ralmuan tawh avangin district thuneitute leh Assam Rifles tangrualin mi 300 dawn an lo chhuahtir tawh a ni. State Election Commission chuan vote pakhat chauh nei awm ta chu a vote thlakna a thup theih dawn loh avangin ruahmanna hranpa an siamsak dawn niin an sawi.

<><><>

DRUG KINGPIN

Police-te chuan ruihhlo tawlhruk chungchanga Mizoram pawn atanga a meizang hlaptu ber ni a puh mi 2, chu tunhnai khan New Delhi-ah an man. Mizoram Police-in tum khata Heroin a man tam berna, Saitual Police Station a August ni 23-a Narcotic Drugs & Psychotropic Substances Act, 1985 leh Foreigners Act, 1946 Sec 14 thubuaia, a meizang hlaptu ber ni a puh Joseph Lianthangpuia (42) Chanakya Place, New Delhi chu Delhi-ah Nilaini-ah khan man a ni a. He thubuai-ah hian lirthei pakhat MZ-01X-1909, Lalliancheua (20) Falam, Myanmar khalh atangin Heroin Kg 15 man a ni. Hemi hma Thawhlehi khan Lalchhuanthangi (50) Aizawl Khatla South tuna Delhi a awm mek chu Delhi-ah Zokhawthar OC kaihhruai Police rual in an zu man baw a. Lalchhuanthangi hi ruihhlo tawlhna a hlawkna tel bertu ni a puh a ni a. Kum 10 kalta-ah khan sorkar khap thil a tawlh avangin Thailand ramah man a ni a, kum 8 vel zet lungina a tan hnu-ah Mizoram lama rawn chuang chhuak tawh lovin Delhi-ah a tawm ta

niin Khatla South khawtlang hruaitu pakhat chuan Akashvani News a hrilh a. Amah leh Joseph Lianthangpuia te hi Special Bureau leh Delhi Police tanpuina in man an ni.

Lalchhuanthangi hi kumin July ni 10-a Zokhawthar khua a Kudam Sen Kai an tih hmuna ruihhlo man chungchanga a meizang hlaptu bera puh a ni a. Hemi tum hian mi 5 man an ni a, an kut atang hian leirawhchan anga siam heroin fir kg 7 leh gram 422 man a ni a. He heroin tawlh kawnga a hotunu ber Lalchhuanthangi erawh chu man tel a ni lova. Zokhawthar Police Station a thawkte'n an chhui zui zelna-ah Delhi-ah a awm tih an hre ta a, Thawhlehi khan an zu man ta a ni. An manna thubuai hi Zokhawthar Police Station a ND&PS Act section 21(c)/29 leh Foreigners Act, 1946 section 14A(b) tlawhchhana ziahluh a ni. Thailand a man a, kum 2022 thlenga jail-a khung a nih tawh piah lamah kum 2023-a Kerala state-a pawisa thila inbumna thubuai nei lai ani a, man a nih lai pawh hian he pawisa thubuai ah hian bail-a a chhuah lai nia hriat a ni.

Heroin tawlh chungchanga a meizang hlaptu pahnihte hi Delhi court a phalna lak fel a nih hnu-ah Mizoram rawn panpui an ni a. Thubuai an neihna he lam court-ah an chungchang ngaihtuah a ni dawn a ni.

<><><>

PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawh ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.

<><><>